

四庫全書

史部

欽定四庫全書

皇朝文獻通考卷二百十九

經籍考

九

史

臣等謹按馬端臨通考史類自正史以下合編年起居注凡三門雜史以下合傳記偽史霸史史評史鈔凡四門故事以下合職官刑法地理時令譜牒目錄凡七門共十有四門蓋以隋史藝文志為

宗而參考宋中興以前諸志者也。古來著錄於正史之外，兼收博採，列目分編，雖各有指歸，然門類分而出入，仍所不免。且代殊事異，或昔有而今無，或昔無而今有，即名目亦不能不因時通變。如偽史、霸史，乃指當時僭撰者而言；五朝續通考已遵欽定四庫全書之例，改為載記一門。今則中外一家咸奉正朔，偽霸之名更宜刪易。至起居注自宋迄明，無可採錄。續通考改為詔令奏議二類。

國家

列聖相承

經綸丕布史局尊藏允宜敬謹恭輯昭示萬世凡詔令之屬謹依馬氏舊例以起居注統之章奏一門馬氏本列集部別集之次顧論事之文與史部為宜今特增奏議類次起居注後故事一門史家多載前代事蹟茲則

國政朝章昭垂典冊未敢仍襲舊目爰從四庫書之

例易其名曰政書至刑法為民命所關我

朝咸中定制

矜慎再三今所著錄已恭列於政書類法令中是以刑法門不復更立餘則悉仍馬氏之舊謹列其目曰
正史曰編年曰起居注曰奏議曰雜史曰傳記曰
載記曰史評曰史鈔曰政書曰職官曰地理曰時
令曰譜牒曰目錄各依次編輯如左

史

正史

編年

欽定明史三百三十六卷

乾隆四年大學士張廷玉等奉

敕撰

臣等謹按我

朝定鼎之初

世祖章皇帝命儒臣纂輯明史歷康熙雍正至乾隆四年始成書凡本紀二十四卷志七十五卷表十三卷列傳二百二十卷目錄四卷其中間有考究未詳

者近又承

命改正四庫全書謹以新定之本著於錄蓋勝代三百年間君臣事實制度典章期於蒐採博洽彰瘡愆常歷有歲年昭詳慎也先是康熙中戶部侍郎王鴻緒撰明史稿三百十卷頗稱詳贍廷玉等因其本而增損之其間諸志一從舊例而稍為變通蓋自

三朝以來屢申公慎之旨復經

皇上睿裁釐正始成定本至若甲申以後續載福王之號乙酉以後并錄唐王桂王諸臣則是

聖人大公至正之心包含徧覆直與天地同流固非編纂諸臣所能仰窺萬一也已

欽定續通志六百四十卷

乾隆三十二年奉

敕撰

臣等謹按鄭樵通志仿司馬遷史記分紀表畧傳

總括古今實通史之體也第其書略定規模未及
修飾紀傳多因襲舊文標題錯誤不無遺議故四
庫全書歸入別史茲續纂唐以後正史皆叅訂異
同折衷沿革定為二例一曰異名者歸一一曰未
備者增修較之原書體裁實為詳密二十畧蒐羅
詳博考証精核如藝文略圖譜略昆蟲草木略則
為小變其例以補鄭氏之未備凡此皆仰承

指授故條理分明自非樵書所及至於紀傳中恪遵

三朝國史之例別立貳臣傳一門此則叔自

宸衷垂為炯鑒植綱扶紀之意即寓於揚清激濁之中
不特非樵所能知即司馬遷亦見不及此凡讀唐
五代宋遼金元諸史者胥當奉此編為定論謹載
入正史為古今言通史者之主準焉

歷代史表五十三卷

萬斯同撰斯同見經類

朱彝尊序曰季野取歷代正史未著表者一一補

之凡六十篇益以明史表十三篇攬萬里於尺寸
羅百世於方策俾覽者有快於心庶幾成學之助
讀史記十表十卷

汪越撰徐克范補越字師退康熙乙酉舉人克范
字堯民皆南陵人

五代史志疑四卷

楊陸榮撰陸榮見經類

臣等謹按吳縝有五代史纂誤頗能訂歐陽氏舛

漏然其書久佚僅存梗概於永樂大典中我

皇上命加編纂始葺成編陸榮在康熙末年宜其未見
續書故以意研求毛舉細故雖間有考訂精核處
而引證未免稍疎

遼史拾遺二十四卷

厲鶚撰鶚字太鴻錢塘人康熙庚子舉人

臣等謹按鶚有樊榭詩集自稱所注遼史比於裴

松之三國志注蓋其採摭羣書至三百餘種實能

考求端緒詳其年月事迹以備參稽惟卷末國語解一編對音舛誤名義多乖伏讀

欽定遼金元三史國語詳明釐正於索倫舊語辨別尤精前代之訛至是始昭然若揭前此故牘因仍固不足以責鶚也

史記疑問一卷

邵泰衢撰泰衢見經類

三國志補注六卷附諸史然疑一卷

杭世駿撰世駿見經類

臣等謹按是書參校異同頗為精核意欲駕出裴

松之三國志注之上雖蕪雜之處瑕瑜不掩而訂訛砭漏所得為多亦足資讀史者之一助焉

右正史

平定三逆方畧六十卷

康熙二十一年大學士覺羅勒德洪等奉

敕撰

臣等謹按是編恭載康熙二十五年十一月

上諭閣臣曰爾等所修平定三逆方畧四冊朕已覽畢其中舛錯頗多如王輔臣由雲南援勦總兵官授為陝西提督今謂由陝西總兵官陞任至論贊中援宋太祖杯酒釋兵權事吳三桂非宋功臣可比乃唐藩鎮之流耳爾等其酌改之仰見

睿鑒親裁權衡至當洪惟

聖祖仁皇帝神武懋昭德威丕播彼三逆恃

愚驕恣自外

生成是以憤合神人膚勲迅奏而八年之間凡
命將遣師

指授方畧無不於是編悉載焉千萬世下共欽
盛烈昭垂益仰

耆定之隆亘古未覩也

親征平定朔漠方略四十八卷

康熙四十七年大學士溫達等奉

救撰

聖祖仁皇帝御製序曰朕祇承

天眷懋紹

祖宗丕基為億兆生民主薄海內外皆吾赤子雖越在邊
徼荒服之地倘有一隅之弗寧一夫之不獲不忍恣然
視也西北塞外喀爾喀七旗與厄魯特四部落並號雄
藩同奉職貢非一日矣不意有厄魯特噶爾丹者賦性
凶殘中懷狡詐戕害其兄弟兼并四部蠶食鄰封其勢

日張其志益侈朕初聞厄魯特與喀爾喀交惡隨遣親
近大臣頒恩賚以和解之迨其後興兵構怨又命大臣
曉譬利害諭令息爭乃噶爾丹抗旨狂逞致喀爾喀為
所潰敗叩關乞援朕收撫之置諸邊內資給餼牽始皆
得所而噶爾丹猶修葺如故所在侵陵忽闢入我烏闌
布通之地朕授鉞親王大臣問罪聲討大師克捷未即
殄除時賊倉皇遁深懼我軍之窮追投牒指誓因而
釋之假使噶爾丹能自此悔禍改圖則雖至今存可也

夫何轉瞬渝盟包藏不軌窺伺我斥堠搖惑我外藩潛
敗我納木扎爾拖音肆虐不止朕深念此寇斷宜速滅
於是整飭士馬備峙糧糗決策親征而賊之踪跡飄忽
無常又慮其兵至遠颺兵退復入乃授密畫於科爾沁
王沙津令其遣使誘賊約至近地旋調發盛京諸路軍
禦東路分遣一軍截西路朕躬統六師從中路入北行
近賊巢噶爾丹不敢抗我顏行聞風奔竄朕遂親率前
鋒軍併日追擊賊窮蹙已極盡棄其子女輜重而遁會

與我西路師遇大敗其軍噶爾丹僅以數人跳身走嗣
是朕再駕而至鄂爾多斯三駕而至狼居胥山麓宣威
布惠兼用互施招徠其黨羽遏絕其歸路其寨桑等接
踵嚮附其子復為我擒賊自料勢不能追遂爾仰藥授
首所親信丹濟喇等亦相繼乞降二十餘年狡悍陸梁
之勁寇曾不二載悉皆草薶禽獮而大業克就矣夫烈
燭弗戢必將燎原積寇一日不除則疆圉一日不靖方
親征之初舉也在廷諸臣多持異議狃於目前之計者

謂兇鋒挫衄無足深憂憚於征繕之煩者謂大漠遊魂
難以就縛不知除惡務盡制勝在謀歷觀漢唐宋之已
事往往罷敝中國之力而不能成廓清邊塞之功良由
經理失宜而殲鋤之不早也朕既遠鑒前轍復追維烏
闐布通之失故不避寒暑艱辛親蒞窮邊三勤薄伐惟
是逆形已著然後徂征怙惡不悛然後撓討身先士卒
則櫛風沐雨而人皆忘勞指畫軍儲則轉饟饋師而人
爭用命茂草茁於荒磧流泉溢於沙陀萬里經行安如

枕席非儆神佑曷繇臻此易曰天之所助者順也人之
所助者信也朕仰憑天道俯愜人情以萬不得已而用
兵之意秉刻不容緩而滅寇之機立拯邊境之毒痛永
底中原於清晏昭告

郊

廟適契成謀使非慮出萬全可輕言師旅哉茲前後用兵
本未具載卷中覽是編者尚克喻朕心焉

臣等謹按卷首恭載

御製紀畧一篇後載告成太學及勒銘察罕齊老拖諾昭
木多狼居胥山諸碑文始於康熙十六年六月訖
於三十七年十月越四十七年七月告成篇中據
事直書語無增飾而

聖謨廣運

親履戎行與

大聖人不得已而用兵之心皆昭垂於卷帙則是編誠與
日月爭光矣

欽定平定金川方略三十二卷

乾隆十三年大學士來保等奉

敕撰

皇上御製序曰金川方略纂輯既竣諸臣以

聖祖平定朔漢方略

御製序文之例為請夫所謂方略者非遙執事權掣其肘而矜自用千里請戰之謂也惟天子將將將將將之道無他信賞必罰而已夫以一隅之不靖徵發士旅飛

輓芻糧驛騷輒及數省舉億兆生靈之命委之一將而攻守失據險易弗知急公事而棄時日失士心而張賊勢甚或擒敗為功逋逃告捷此而不誅時乃失罰至夫蓋臣宣力盡瘁馳驅金石可孚豚魚斯格成勞卓越則車服以庸之旂常以紀之稽績逮於行間執秩陳於幕府酬庸之典孰大於是此而不酬時乃悵賞且夫天討有罪叛則誅而服則舍兵革非快意之圖慘殺違好生之道然非其悔禍誠切向化革心

顧以姑息為包荒旋撫旋叛蔓延益熾雖由司事者
動乏成算而廟堂之無策亦已甚矣朕有鑒於大權
之不容旁貸有罪不赦有功必錄既服不誅命討一
出於事理之當然而實無容心焉此兩年中宵旰憂
勤始終弗懈保大定功之本意而編集之不可以已
也若乃指授機宜視

皇祖之親勤鑾馭固無由仰企萬一而金川夙隸職方亦
非噶爾丹絕漠狡寇可同日而語要之行師者保邦

之大事爰允所請弁言以示來許

臣等謹按是編始於乾隆十一年十一月訖十五年十二月分卷二十有六又恭錄

御製詩文一卷附載諸臣詩文五卷凡三十二卷首紀九姓之搆釁逮郎卡之歸命具見

廟謨決勝洞燭遐荒舞

舜羽於七旬宏

湯網之一面

好生之德藹然具著於簡編彼怙惡不悛而狡焉復逞者厥後藁街之戮真法所不能再貸耳

御定平定準噶爾方畧前編五十四卷正編八十五卷
續編三十三卷

乾隆三十七年大學士公傳恒等奉

敕撰

皇上御製序曰平定準噶爾方畧書成纂言者以序請
夫序者所以叙其事之本末而因文以悉其肯綮也

事之本末則方畧三編盡之矣太學之碑磨崖之銘
西師之詩開惑之論亦既悉其肯綮矣如是則可以
不煩重序雖然五年之間大勲兩集又十年而後書
成是不可以無序且朔漠金川前例具在也乃允其
請而為之序曰功不可以虛成名不可以偽立幸不
可以屢微志不可以少侈夫用兵中國自古為難而
沉踰沙漠天山萬里而遙乎旰斯宵斯劬劬以至有
成功非虛而名非偽是僅可免後人之指摘耳若夫

揚揚自詡以為誠若能操必勝之券則不惟致物議而貽口實於心亦誠慙若也藉衆之力幸底於績然我士卒之撓鋒鏑者不為少矣故此書之輯率因忠魂義魄不忍令其泯沒無聞具載以志之而猶不在於擴土開疆之為也既平準噶爾延及回部悉主悉臣耕作賦役興焉此亦一再徵幸矣而猶不自知足欲屢試我銳而別有圖是志侈也志侈者不祥故近日撤征緬之旨甫降而彼適投誠我兵振旅以還告

成事焉此非盈虛消息之理捷若響應乎是則此序之作不惟廻思而若有驚亦且永圖而懷有戒也

臣等謹按是編記開闢西域始末釐為三編自康熙三十九年七月乙未至乾隆十八年九月壬申誌其緣起詳述

聖祖以來屢申撻伐之事是為前編自乾隆十八年十一月甲戌至二十五年三月戊申備錄掃蕩伊犁及削平阿睦爾撒納殲馘波羅尼都霍集占之事是

為正編自二十五年三月庚戌至三十年十一月
庚寅凡一切列戍開屯設官定賦規畫善後事宜
與討定烏什及絕域嚮風之事畢載焉是為續編
蓋前代豐功武畧史不乏書未有展拓黃圖二萬
餘里使龍沙雪嶺之間安如庭闥

聖武遠揚有如是之超前軼後者於以光昭
祖烈垂裕萬年真為書契以來未之一覩者已

皇清開國方畧三十二卷

乾隆三十八年大學士舒赫德等奉

救撰

皇上御製序曰粵昔成湯放桀於南巢惟有慙德曰予
恐來世以台為口實斯成大聖人昭德垂裕萬世之
訓而非漫為謙辭也蓋世之治亂猶日月之盈晦四
時之周序治極必亂亂極亦必返治此守器者所宜
保泰而嬪代循環所由有開邇也湯之後為武王其
於處桀紂則武已不如湯矣三代以下武之不如其

餘又何足屈指數故以開叙論之實不如有元之與
我大清也夫中國之嬗代莫非其祖宗本其君之臣
子也有元興於北漢我大清興於東海與中國無涉
雖曾受明之官號邪究不過羈縻名繫而已非如亭
長寺僧之本其臣子也况乎戴不共之讐乘自壞之
勢撫定中原建基立極以武王于湯有光擬之則實
於漢明有光而唐宋在所弗論矣故茲開國方畧之
著不重於繼明定中原而重於自鄂多理以至赫圖

阿拉因十三甲筭路籃縷得盛京而定王業若夫興
王之始長白朱果蓋猶簡狄元鳥姜源履跡

天生

聖人治四海必有祥符與衆不同而更在於

聖人之奮智勇受艱辛有以冠人世答

天命夫豈易哉予小子受

祖宗之業每於讀

實錄觀我

太祖開國之始躬干戈冒鋒刃有不忍觀不忍言而落淚者
繼思不忍觀不忍言之心為姑息之仁其罪小觀至
此而不念

祖宗之艱難不勤思政治以祈

天永命慎守神器其罪大故令諸臣直書其事以示後世
即明臣之紀本朝事蹟如黃道周之博物典彙之類
不妨節取以證信實然予此為非啻自勵而已也欲
我萬世子孫皆如予之觀此書之志其弗動心落淚

深思永念以敬

天命守

祖基兢兢業業懼循環治亂之機則亦非予之子孫而已
矣此開國方畧之書所以作也嗚呼可不敬哉可不
慎哉

臣等謹按班彪王命論曰帝王之祚必有明聖顯
懿之德豐功厚利積累之業然後精誠通於神明
流澤加於生民故能為鬼神所福饗天下所歸往

韙哉斯言此雖唐虞三代禪伐不同然而受命之符其揆則一我

國家累承

世德誕受

鴻圖

太祖高皇帝經綸草昧

太宗文皇帝式擴畋章洎我

世祖章皇帝入關定鼎統一寰區

文德武功蔚然大備而事經十紀或未能縷晰其詳我

皇上艷揚

前烈垂裕後昆

特命儒臣纂述成編冠以

發祥世統一篇自

太祖高皇帝癸未年始至天命十一年丙寅凡八卷自

太宗文皇帝御極始至順治元年甲申凡二十四卷鉅目

鴻綱編年紀載遠邁典謨之所紀實為史冊所未

聞千萬世下跪誦是編共恍然於我

祖

宗運世之本

功德所紀有如是之艱難締造者宜乎

神器之膺與天無極也

欽定勦捕臨清逆匪紀畧十六卷

乾隆三十九年大學士舒赫德等奉

敕撰

臣等謹按是編紀戡定山東逆匪王倫而作倫以
驚忍悍戾之徒逞其邪說因而聚黨作奸螳臂之
逞誠不自量伏念我

皇上臨御以來

厚澤深仁淪肌浹髓頻年賑卹蠲除不下數千萬計食
福飲和人思効命

神武懋昭

勇智天錫宜乎膚功之奏無有迅於是役者篇中所載

顏末具陳至其倡亂雖始於壽張而伏誅則在於
臨清故以臨清紀畧為名焉

欽定平定兩金川方畧一百三十六卷

乾隆四十六年大學士公阿桂等奉

敕撰

皇上御製序曰前平定金川實祇受促浸一處之歸降
後平定兩金川則并促浸償拉兩處削平之而屯戍
其地不讀前方畧不知予之撫順宥過之寬惠不讀

後方畧不知予之保大經久之苦心兩金川之備患
奢望屢赦屢叛與夫不得已用兵之原委亦既見之
後告成太學之碑文矣茲方畧成而司事者以序請
從其請是贅言弗從其請是闕體以書之有弁辭藏
體例也夫示之義方之謂方定之智畧之謂畧有方
無畧失之執有畧無方失之隨二者相需殷而相得
彰且方有隅之義而象地畧有包之義而象天乾圓
坤方陰靜陽動即兵法實不出乎此要之本於敬而

弗懈公而無私泰而不驕勤而非躁然後能賞罰明而進退當緩急應而機宜合運之九重之上示之絕域之遙忘憂不可掣肘益不可是必注精神於董事之諸臣而念辛苦於衝鋒之衆士嗚呼定方畧豈易言而成方畧更難覩也今幸覩方畧之成庶乎五年忘餐廢寢之勞得以少慰而藉以解後世窮兵黷武之譏所謂伐逆不伐順伐險不伐夷者或庶幾乎

臣等謹按篇首恭錄紀畧一卷

天章八卷末附臣下詩文八卷書中所載平定兩金川
事則始於乾隆二十年六月以迄乎四十四年十
一月也粵稽冉駝舊地險絕寰區自中國用武以
來兵力雖強罕有能至其地者故卽卡歸命而後
其子索諾木煽惑小金川僧格桑逞其鷙忍肆厥
鯨吞以為石棧天梯勢難飛度我

皇上造化由心輿圖在掌

運籌九天之上決勝萬里而遙僧格桑授首行間索諾

木獻俘

闕下仰見

耆定之隆實為曠古所未有而昔曾開一面之網今復
申九伐之討者

聖主固出於不得已也

欽定蘭州紀畧二十一卷

乾隆四十六年大學士公阿桂等奉

敕撰

臣等謹按是編恭紀戡平逆回蘇四十三始末回人久隸版圖散處中國其雜居西北陞者性多獷悍蘇四十三等詭稱傳法於祖國別立新教與舊教構爭遂萌不逞嘯聚河州用是

命將遣征殲除醜類凡

睿謨碩畫具著篇中所以為自外

生成者之炯戒也

欽定歷代紀事年表一百卷

康熙五十年內閣學士兼禮部侍郎王之樞等奉

敕編

聖祖仁皇帝御製序曰古者紀事之書其體有二專紀一事而具其始末者尚書之體也編年而通紀一時之事者春秋之體也自漢司馬遷作史記盡變尚書春秋之體而後世為史者皆師之然其法實不外乎尚書春秋其本紀世家即春秋通紀時事之體八書與列傳即尚書專紀一事之體而所謂年表者又編年之變例也歷

代之史具矣而表多缺焉康熙四十四年春朕南巡吳
會有儒生龔士炯進其所編歷代年表若干卷起陶唐
而終於隋朕惜其用心之勤而業未境也乃命侍郎周
清源內閣學士王之樞續之迄於元至正之末凡一百
卷其體依倣諸史而微有別者諸史之表各分一類而
是編則王侯宰輔以及外藩層次附列於帝紀之下諸
史之表獨載廢置朝會征伐之大者而是編則每事皆
係焉是其所以異也代遠文繁親加裁定復考正三元

甲子編年一卷列諸簡端昔宋袁樞為紀事本末朱子
以為與資治通鑑相表裏亦猶左氏之於春秋既依經
而作傳而復別為國語以相錯綜也以是知紀事之書
不厭其類之廣蓋以歷世久遠事物紛蹟觀者易於遺
忘故別為一體以提其要而使致詳焉是編之作亦所
以備史之一類云爾翰林檢討馬豫鐫板告竣為序其
大指如此

凡例曰司馬遷史記年表及司馬光通鑑目錄皆

以年為經以國為緯茲本其例記事以朱子通鑑
綱目南軒綱目前編商輅續綱目為主酌加裁損
復叅之司馬光資治通鑑金履祥通鑑前編薛應
旂宋元通鑑及二十一史始唐虞迄宋元代殊事
異表亦隨時變式隨式變例各有取義焉

御批通鑑輯覽一百十六卷附明唐桂二王本末四卷
乾隆三十二年大學士公傅恒等奉

敕撰

皇上御製序曰編年之書莫備於

皇祖御批之資治通鑑綱目蓋是書集三編為一部自三
皇以至元末明初振綱挈目謹予嚴奪足以昭萬世
法戒為人君者不可不日手其帙而心其義也然

皇祖雖嘗抉精微徵辭旨著論百餘首亦惟析疑正陋垂
教後世耳於其書則一仍厥舊無所筆削也故全書
篇幅雖多而議論乃什倍於事實即如前編之中總
論史論音釋辨疑考證紛不一家正編之中凡例發

明書法考異集覽考證正誤質實濫觴益甚至於續編之作成於有明諸臣其時周禮沿尹起莘例作發明而廣義則出於張時泰效劉友益書法而為之者夫發明書法其於歷朝興革正統偏安之際已不能得執中之論而况效而為之者哉且以本朝之臣而紀其開國之事自不能不右本朝而左勝國此亦理之常也况三編中嬗代崛起之際稱太祖而繫以我者不一而足亦非體例也故命儒臣纂歷代通鑑輯

覽一書盡去歷朝臣各私其君之習而歸之正自隆古以至本朝四千五百五十九年事實編為一部全書於凡正統偏安天命人心繫屬存亡必公必平惟嚴惟謹而無所容心曲徇於其間觀其書者凜天命之無常知統系之應守則所以教萬世之為君者即所以教萬世之為臣者也書中批論一依

聖祖之例自述所見據事以書者十之三儒臣擬批者十之七而經筆削塗乙者七之五即用其語弗點竄者

亦七之二云

臣等謹按明正德中李東陽等撰通鑑纂要一書

舊藏

內府

皇上因其紀載舛漏褒貶失宜

命儒臣詳稽史傳參訂是非

親灑丹毫祥加評斷

酌理準情推見至隱而尤於系統年表

示予奪進退之大公大哉

王言所謂非一時之書而萬世之書也至於福王南渡
殘喘苟延

特命於乙酉一年分注以存其位號唐桂二王竊據稱
戈跡同曁曷而遺臣軼事猶

命考稽顛末附綴篇終此則

覆幬之量尤非涑水紫陽所能窺見萬一者已

欽定通鑑綱目三編四十卷

乾隆四十年奉

敕撰

皇上御製序曰編年之書奚啻數十百家而必以朱子通鑑綱目為準通鑑綱目蓋祖述春秋之義雖取裁於司馬氏之書而明天統正人紀昭監戒著幾微得春秋大居正之意雖司馬氏有不能窺其藩籬者其他蓋不必指數矣嘗謂讀書立言之士論世為難非如朱子具格致誠正之功明治亂興衰之故其於筆

削鮮有不任予奪之私失褒貶之公者自綱目成而義指正大條理精密後儒有所依據踵而續之由宋迄元釐然方策至明代君臣事蹟編輯之難更倍於諸書蓋明史已成於百年之後而世變風漓記載失實若復遲待將何以繼續編而示來許爰亟命儒臣法朱子通鑑綱目義例增損編摩大書以提要分注以備言每一卷成呈覽朕於幾暇亦時御丹鉛為之參定雖於天人一貫之精微未之能盡而惟是謹嚴

之義守而弗失簡正之旨志而必勉書既成羣臣舉
唐太宗之事為言勉從其請而為之序云

臣等謹按先是大學士張廷玉奉

詔輯綱目三編褒貶則極其謹嚴事迹則多所闕漏又
塞外人名地名音譯亦踈於考正至是乃

特命改修其大書體例悉遵

欽定通鑑輯覽細注則備核史傳補遺糾繆使端委秩
然又作發明以闡書法增質實以備參稽至於譯

語則一本

欽定遼金元國語解以訂正其舛訛蓋

睿裁精審迴越尋常宜非廷玉等初編之本所能擬其
詳密矣

綱目分注拾遺四卷

芮長恤撰長恤字蒿子原名城字巖尹溧陽人前
明諸生

臣等謹按朱子作綱目屬分注於趙師淵故其刪

削通鑑率多舛漏後人悞以為朱子所作皆強為之詞長恤知非朱子手筆乃取通鑑原文與分注互勘各係考辨於後不特糾師淵之失實可為有功於紫陽也已

皇王史訂四卷

李學孔撰學孔字瞻黃渭州人順治中官大寧衛斷事

竹書統箋十二卷

徐文靖撰文靖見經類

臣等謹按竹書紀年有附注偽傳出自梁沈約是書稱箋者所以別於注也稱統箋者不特於紀年箋之附注箋之諸凡所引書傳間有偽誤亦并箋之也蓋文靖誤以紀年為原書又誤以附注真出沈約故以箋自名

綱目訂誤四卷 通鑑胡注舉正一卷

陳景雲撰景雲字少章常熟人寄籍吳江縣學生

景雲自序曰朱子通鑑綱目屬門人天台趙幾道
成之朱子病其中多踈漏有意更定竟未及為元
汪克寬有考異徐昭文有考證凡綱之踈漏據提
要正之至分注之誤則在所畧景雲搜覽分注意
所未安輒加訂正其綱中之可疑者間附焉

資治通鑑後編一百八十四卷

徐乾學撰乾學見經類

此本軒紀年畧五卷

焦袁熹撰袁熹見經類

考定竹書十三卷

孫之騷撰之騷見經類

通鑑綱目釋地糾繆六卷補注六卷

張庚撰庚字浦山秀水人乾隆丙辰薦試博學鴻

詞

庚自述曰通鑑於地名為要地名而有關軍事為尤要通鑑有胡身之注若王幼學集覽馮智舒質

實每於地名不考任意引注庚取胡注校定其半
又主顧祖禹讀史方輿記要再證以輿圖名曰糾
繆其所未詳者不注者一一補之惟封爵之地多
挂空名有不補也

讀史綱要一卷

王植撰植見經類

右編年

皇朝文獻通考卷二百十九

欽定四庫全書

皇朝文獻通考卷二百二十

經籍考十

史

起居注

臣等謹按五朝續通考改馬氏起居注為詔令奏議良以寔錄日厯等編宋代以下散佚無存其書既無可採登其目即不能仍舊因時通變理固宜然洪惟我

國家肇興東土

列聖相承

五朝實錄炳朗中天

聖訓煌煌昭垂奕葉凡史局所尊藏

記注所恭載

豐功偉烈遠邁二典三謨之盛敬謹纂輯以符端臨通考

舊例焉

太祖高皇帝實錄十卷

崇德元年大學士剛林希福等恭修康熙二十一年大學士覺羅勒德洪明珠奉

敕重修雍正十二年大學士鄂爾泰張廷玉等奉

旨校訂

皇上御製序曰粵稽自古帝王乘時建極膺天命而佑
下民豐功駿烈垂諸史乘炳炳麟麟是以紀言紀事
必詳且核焉況於聖人首出開物成務經緯天地奠
麗河山智勇沈深謨猷訏遠布為法則著為章程將

使後世子孫繼繼承承遵循罔軼詎不重歟洪惟
太祖承天廣運聖德神功肇紀立極仁孝睿武端毅欽安
弘文定業高皇帝以聖神文武之姿受

天眷命誕興東土爰總義旅邁求厥寧九國連兵相向一
怒而討平之明人四路來攻亦尅日盡殲於境外師
出有名光明俊偉威愛並立近服遠懷當是時羣部
來歸英豪嚮附奮迹遼瀋之間而號令行於萬里帝
業之興何其神也由是天人協應建國紀元修明庶

政教育羣倫創國書分旗制申軍令定禮儀經營締造之際旰食宵衣不遑暇逸故乃綱舉目張傳之億萬年而不可易心法治法與二帝三王有同揆也

太宗文皇帝繼天登阼命儒臣敬輯

實錄規模畧備

聖祖仁皇帝復加蒐考修纂成書尊藏內府並貯史宬惟是山川疆土以及臣僚名氏前後間有異同清漢之文或簡或繁未經畫一我

皇考世宗憲皇帝懼有舛訛特開史館重加校訂按日進呈

親為閱定朕纘承丕緒仰體

前徽用復潔誠披覽卷帙如舊繕錄一新祇祇乎覲開國之鴻謨昭垂統之大業書曰監于先王成憲其永無愆詩曰昭茲來許繩其祖武於以率攸行而保

天佑其敢忘紹庭上下之思哉謹序

太祖高皇帝聖訓四卷

康熙二十五年

聖祖仁皇帝恭編

聖祖仁皇帝御製序曰朕惟帝王創業垂統傳之無窮非獨世德茂也蓋亦有典則之貽焉其運之一心播為成憲恒足以示道揆於子孫昭法守於臣庶盱衡千古載籍具存矧其為大聖受命而興者乎皇哉何規模之弘遠也我

太祖承天廣運聖德神功肇紀立極仁孝睿武弘文定業

高皇帝靈承休命誕受多方經綸於天造草昧之年締構
於王業艱難之日除殘伐暴度越漢唐順天應人絜隆
湯武所以茂弘風教宣暢聲靈振舉綱維恢張疆宇者
勒諸蘭臺之上布在方策之中駿烈鴻猷粲然明備矣
若其攄詞為典播告成經建邦立國之模戰勝攻取之
畧化民成俗之務用人行政之方靡不道合樞機理取
體要有非臣鄰所能悉覩黎獻所能盡傳者不有成書
何以彰

聖謨而答光訓乎朕紹庭繼緒志切覲揚因命儒臣分類編輯為目二十六為條九十有二總為

寶訓四卷浩浩乎乾包坤負之大皇之墳也秩秩乎民彝物則之常帝之典也以紹心法至中也以握化原至正也以迓

天眷至順也以垂後昆至裕也率而循之欽承而無數之所以卜有道之靈長繇無疆之厯服胥於是焉在奕世子孫尚其克念

祖武永永勿替也哉

皇上御製序曰朕惟神聖首出濟世覺民立德立功立
言三者統而有之蓋仁義中正之極定於厥躬布諸
紀綱為巍巍之帝業頒諸誥令成洋洋之聖謨文教
彰明覃被海宇炳乎如日月之照臨窮天地亘古今
而莫不仰焉於戲盛哉洪惟

太祖承天廣運聖德神功肇紀立極仁孝睿武端毅欽安
弘文定業高皇帝體肖二儀量包六合應期受命肇建丕

基叶雲雷以展經綸法四時而宣教化六師順動九
有輸誠拯生民於塗炭之中轉宇宙為平成之運當
是時締造維新規模盡善武緯文經萬物咸覩亦既
布在方策傳信億年矣乃若心通造化道綜百王吐
詞成經發聲為律闡貞一之旨明至善之宗論聖學
則以正心修身為先辨君道則以求賢聽言為要昭
晰乎

上天降監之原無念不將之以敬畏申儆乎君臣契合之

誼每事必體之以公誠以至班朝治軍明刑制用靡不敷陳至理約而該複而不厭信乎有德者必有言也我

聖祖嘗命儒臣編輯

聖訓四卷類聚條分燦然明備朕紹膺統緒追契徽猷口誦心維匪伊朝夕仰見義蘊之淵閎典章之畫一庶政之周詳直與帝典周官同其廣大顧金匱石室之藏廷臣無由得見是用敬加剞劂宣示萬方俾我子

孫臣庶率而循之世世罔斁奉之涖政可以致治保
邦準以淑躬可以做心寡過蓋一時之制作而萬古
之世道人心胥賴焉非甚盛德其孰能及此乎謹序
臣等謹按所分四卷凡二十六類析為九十二則
粵自有明末造綱解紐弛鍾

王氣於大東審

神器之有授

太祖高皇帝恭膺

天眷誕造

丕基以遺甲十三人

肇開鴻業

經綸締造薄海歸

仁仰惟

聖哲顯融之德運世有基

聰明睿智之符健行不息用是

敷為典訓義蘊淵閎紹千古之心傳垂萬年之

家法我

聖祖仁皇帝仰契

前徽命儒臣敬謹編述彰聞

鴻謨九十二條之中固已致廣大而盡精微矣豈非萬世
所宜聰聽者哉

太宗文皇帝實錄六十五卷

順治九年大學士希福范文程等恭纂康熙十二
年大學士圖海覺羅勒德洪等奉

敕重修雍正十二年大學士鄂爾泰張廷玉等奉

旨校訂

皇上御製序曰洪惟

太宗應天興國弘德彰武寬溫仁聖睿孝敬敏昭定隆道
顯功文皇帝狗齊敦敏廣大寬仁早從

太祖贊襄大業才德冠世中外歸忱迨乎嗣統之年敦宗
睦族戢衆安民御將行師開疆拓土軍威震疊而以
不嗜殺為心武功赫濯而以善養人為務存朝鮮故

土字蒙古遺氓明政不綱天人共憤且舊與我國有
隙於是應天順人率師直抵燕京聲罪致討猶念彼
為中國功垂成而弗取天性仁厚大度豁如固已超
越百王包涵六合矣至若建官分職推賢舉能愷澤
龐鴻刑章平允設制科以崇文教開言路以重忠良
隆規鉅典巍乎煥乎皆一統之大猷百世之良矩也

世祖章皇帝輯為

實錄六十有五卷

聖祖仁皇帝命儒臣蒐討訂正繕錄成編尊藏惟慎
皇考世宗憲皇帝孝切崇

先敬加披覽以前後字句之未盡畫一也復

令臣工校對而

躬為閱定焉朕仰承遺志莊誦繹思用竣厥事緬惟帝典
商盤前王之懿範也天球琬琰宗廟之重器也昔之
君珍為世寶奉以無墜矧夫典章所紀謨烈所垂造
邦制治之圖啟泰貽安之要煌煌簡策世昭法守何

止帝典商盤天球琬琰之寶重也耶謹序

太宗文皇帝聖訓六卷

順治末

世祖章皇帝恭編康熙二十六年

聖祖仁皇帝續成

聖祖仁皇帝御製序曰朕惟帝王誕膺天眷肇造丕基功
德茂隆疆宇日闢有紀綱以昭大法即有謨訓以啟後
昆方策具存燦然可考也若夫道兼作述業裕創垂以

聖繼聖而鉅烈鴻猷煥乎宇宙間者尤足冠百王而立極焉欽惟

太宗應天興國弘德彰武寬溫仁聖睿孝隆道顯功文皇帝躬上聖之資承開天之運神武不殺寬和有制萬國向化而賓從庶績撫辰而就理峻德弘勲巍巍蕩蕩稱極盛矣至於命令詔誥誕播宏詞皆義切訓行理歸體要洪纖畢舉本末咸周而其大指之所存則首在於愛養生民旁求俊乂敕幾凝命惇典明倫大哉王言誠治平

之極則也我

皇考世祖章皇帝嘗命纂修未竟厥緒朕嗣膺歷服念切
繼承爰命儒臣詳加編輯計一百一十一條分二十三
類定為

聖訓六卷既成因披陳莊誦朝夕繹思見夫旨原於精一
義著於典謨上之可以正道揆焉下之可以昭法守焉
書曰監於先王成憲其永無愆詩曰不愆不忘率由舊
章自昔詩書所載莫不以紹衣為兢兢矧夫義蘊精深

規模宏遠嘉言彞訓超踔古今朕用是覲揚光烈昭示
來許後之子孫以此蘊之於心則為天德敷之於政則
為王道範圍臣庶則為會歸之極垂裕後昆則為貽燕
之謀尚其夙夜祇承以為致治保邦之本而迓祈天永
命之休也是為序

皇上御製序曰聖人之情因辭以見易曰修辭立其誠
所以居業也蓋以通天下之志以成天下之務本乎
至誠施諸命令無意於辭而理臻其極歷觀堯舜禹

湯文武之世典謨訓誥鑒然具存後人奉之為經列
在學宮為載籍首矧夫運際開天功存繼志制作侔
造化教澤被生民天下之文章孰有大於此者乎欽惟
太宗應天興國弘德彰武寬溫仁聖睿孝敬敏昭定隆道
顯功文皇帝英姿挺出聖武布昭大智如神淵衷若谷及
登寶位疆宇日增厚祿以養賢勤身而率下恩威所
及大畏小懷政教所孚遠來近悅皇哉何化理之神
也至若敷陳治道誨諭臣民不尚虛文惟崇大體謂

行善所以事天而遠利始能服衆闡伊尹一德之訓
稱曾參三省之言以勸農講武為立國之大經以考
古讀書為服官之要務自立綱陳紀以逮服飾器物
之間或即事以宣猷或因時而定制洪纖咸備張弛
攸宜蓋察理精故見之也遠更事久故慮之也詳用
能承藉丕基佑啟

聖哲是誠億萬年繼往開來之極軌也順治中嘗因記注
舊文纂修

聖訓一書未竟厥緒

聖祖仁皇帝特命儒臣詳加編輯事以類分凡二十有八
言以條舉凡一百一十有一彙為六卷體要著明朕
在宮中蒙

皇考恩勤教育定省之時備聞

祖訓嗣膺大統志切續承晨夕披陳尋繹仰見心符道要語
中機宜旨蘊閎深函蓋天地文辭昭晰彪炳日星垂
裕後昆永昭法守用是勒為成書敬授剞劂頒示中

外書曰聖謨洋洋嘉言孔彰又曰聖有謨訓明徵定保我子孫臣庶其誦習遵循永敬承於世世哉謹序

臣等謹按所分六卷凡一百一十一則欽惟太宗文皇帝守成創業益擴昉章所以開一統之基者謨訓昭垂布在方策巍乎煥乎宜與天地同其悠久矣世祖章皇帝實錄一百四十六卷

康熙六年大學士巴泰魏裔介等奉

敕恭修雍正十二年大學士鄂爾泰張廷玉等奉

旨校訂

皇上御製序曰我國家受

天眷命統一萬邦日月所照血氣之屬咸切尊親亦惟是
小心翼翼之忱有以通

帝載而昭來許故乃朝廷官府之政罔不參稽古訓溥協
人心制定於一時而慮周乎萬世重熙累洽至於今
茲海隅蒼生穆然想見盛德信乎開國之規模詒謀

遠而流澤長也洪惟

世祖體天隆運定統建極英睿欽文顯武大德弘功至仁
純孝章皇帝神靈天亶冲齡踐阼紹我

太祖

太宗丕緒懋建大猷勤思上理當是時流賊已入京師明
祚已成板蕩遂因明將吳三桂之請

命將士入關定燕京殄羣寇挈斯民於水火之中而登之
衽席之上爰主

郊禋式頒正朔自古得天下之正未之有比也政令彰施
百度具舉滌前代之煩苛沛興朝之膏澤治化翔洽
達乎四表由是制禮作樂敷教明刑虛己以尚賢推
誠以納誨斟酌損益秉至中而時措之著為謨訓載
在簡編皇哉唐哉子孫世世守之以成久安長治之
業於是乎在康熙十一年

聖祖仁皇帝特開史館纂輯

實錄凡一百四十六卷雍正十二年

皇考世宗憲皇帝恭閱全書復令儒臣重加校訂事未竣

而

龍馭上賓朕哀戚之餘飭令陸續進呈敬加披覽於戲覩
世祖

聖祖經綸之鉅典則知創業之甚難念

世宗繼述之深衷則知守成之不易方策可傳者紀綱之
成規夙夜罔間者兢業之一心敢弗繹思而敬承之
以迓

上天無疆之休則是書也誠致治之權輿萬年之鴻寶矣

謹序

世祖章皇帝聖訓六卷

康熙二十六年

聖祖仁皇帝恭編

聖祖仁皇帝御製序曰朕惟自古膺圖御歷之后躬集大
統手致太平懋烈豐功光前翼後行之為政斯發之為
言義蘊固卓越乎百王訓行尤昭示乎奕禩惟聖有作

後人述焉千載同揆也我

皇考世祖體天隆運英睿欽文大德弘功至仁純孝章皇
帝神靈首出智勇天授稟英斷之姿而持以恭儉擴寬仁
之量而濟以憂勤爰是冲齡定鼎薄海歸心救生民於
水火之中而庶政咸熙萬邦作乂德盛勲崇負哉莫尚
矣若夫宵旰圖維宮庭訓敕煌煌綸綍嘉言孔彰究聖
學之高深著王道之正直凡所以凝

天命揚

祖德顧民畧持國體者丁寧反覆深切著明而意旨所注
尤殷殷乎省躬克己納誨親賢綱紀畢張淵衷若歎及
乎訓誡臣下守正奉公鼓勵激揚至誠感發靡不輸服
而効忠黽勉而奮績也蓋自我

太祖高皇帝肇造鴻基

太宗文皇帝式廓駿業而我

皇考心傳合一丕顯丕承弘闡經猷布為政教所以即事
成謨遇物為誥包羅典冊釐剔章程美善畢臻鉅細咸

備堯咨舜倣何以加茲朕祇承遺緒惕厲靡寧瞻方策之常新優羹牆之如覩因命儒臣分類編纂朕復詳加披繹計一百一十三條統為

聖訓六卷寶諸金匱拱若球圖俾後嗣子孫知我

皇考之貽謀燕翼百世無疆開國經綸萬年時叙所以杜愆忘而遵典則者心法於是乎在書曰紹聞衣德言詩曰紹庭上下陟降厥家嗚呼可不敬哉

皇上御製序曰古昔帝王應運而興開物成務有君天

下之規模凝命救幾有師天下之典則故言出而成
經教思所被率土歸仁歷觀往代紀載肇乎二典彝
倫敘於九疇罔不播為成憲炳若日星簡籍具存可
考而知也欽惟我

世祖體天隆運定統建極英睿欽文顯武大德弘功至仁
純孝章皇帝秉岐嶷首出之姿建永清大定之業冲齡踐
阼統一車書義問達乎梯航仁聲徧於塗巷盛德大
業富有日新自唐虞三代以來史冊所傳罕有及者

至若洋洋

聖謨包含萬有大之闢倫教綱常之重而閭閻之日用飲食所弗遺精之在身心性命之微而官府之制度典章所必飭巨細畢該綱維盡善要惟本精一執中之奧蘊以成經世服物之鴻謨誕告多方嚴明愷摯訓敕有位深切周詳意皆出乎至誠理尤協於克一用以光大前徽開萬年有道之長夏乎與天地為昭矣我

聖祖仁皇帝躬承

先訓命儒臣分類編輯計一百一十有三條彙成

聖訓六卷以傳久遠我

皇考念切紹衣宮庭宵旰追述

先猷朕從溫清之時聞知維謹嗣膺大統志在覲揚朝夕

披陳具見開國經綸超越前古詒謀燕翼垂裕無窮

是用敬為剏勵昭示臣民俾海隅出日之遠咸覩光

華寶之如圖球信之如著蔡是訓是行欽承勿替庶

幾道德一而風俗同唐之政要宋之寶訓夫豈可同年而語者哉謹序

臣等謹按所分六卷別為三十二類仰惟

世祖章皇帝宅中定鼎率土傾心一百十三章之內

聖謨廣運炳三光而羅萬象誠億萬世所宜法守者也

聖祖仁皇帝實錄三百卷

康熙六十一年十二月

世宗憲皇帝命吏部尚書一等公隆科多大學士嵩祝白

潢等恭修

世宗憲皇帝御製序曰粵稽古載籍以來聖帝明王德隆業茂莫不揚休紀美照耀簡編若夫

上天純佑下民聚扶輿積厚之氣篤生

至聖備道德之崇廣集皇王之大成經綸宇宙彪炳帝紀巍巍乎蕩蕩乎自義軒至今未有如我

皇考聖祖仁皇帝之盛者也洪惟

太祖

太宗肇構鴻基發祥垂裕

世祖開天建極統一寰區暨我

皇考天亶神靈丕承

先烈以徇齊敦敏之質而學有緝熙以繼體守成之時而
事兼開創以光華格被之勲而日新盛德以邇隆熙治
之運而時敷幾康

臨御寶祚六十餘年歷服綿長超越千古仁漸義摩文經
武緯典章大備聲教覃敷峻德崇功蟠天際地有如敬

天凜昭事之誠尊

祖切覲揚之志

郊壇裡祀歲必躬親

廟享薦馨心虔對越用致

蒼穹之昭假聿彰

謨烈之丕承奉事

兩宮尊養備極承歡致敬閱數十年巡幸則躬扶

鸞輅侍疾則步禱

欽定四庫全書

皇朝文獻通考
卷二百二十

三

南郊送龍輜而親行瞻

寢園而灑淚自古天子之孝莫與比隆友愛裕親王等垂
老靡間視疾臨喪恩禮交至推仁宗室教育天潢展親
惇族誼莫厚焉宵衣旰食明目達聰

親政六十餘年夙夜勵精始終惟一

臨軒召對虛已求賢敷陳有益於民生必蒙採錄廉能實
見諸治效立荷

寵褒眷耆舊而體貌攸崇簡俊乂而程材罷使小廉大法

百僚皆得其人綱舉目張庶司各修其職四方之利弊
周知萬里之情形洞燭愛民如子軫恤維殷普樂利於
農桑裕益藏於積貯偶遇水旱立沛恩施發帑蠲租動
以數百萬計即在屬國運粟賜糧視同一體德洋恩溥
故黎庶樂業中外阜康慎重刑章哀矜庶獄每於奏讞
明允之中施仁法外嚴寒停遣盛夏弛刑大逆寬族誅
叛人無孑戮如天好生之德洽於民心欽恤之仁無以
加矣

欽定四庫全書

皇朝文獻通考
卷二百二十

三

講幄弘開精研道要考六藝之折中挾性理之精義

宸翰則鸞迴鳳翥

天章則玉振金聲

御定諸書包涵萬有融貫百家絃帙瑤編充牣冊府生知

天縱莫名

聖學之高深加以重道尊師表章儒術

親詣闕里瞻拜加虔賜博士於五賢躋紫陽於十哲

訓飭多士敦崇實學加科廣額惠浹儒林壽考作人於斯

極盛

聖武布昭

神謨密運天戈所指立奏膚功平三逆收臺灣布爾尼應期而授首俄羅斯望風而請命

躬率六師三臨朔漠殲噶爾丹而藩服乂安

命將徂征長驅絕域復達賴喇嘛而西陲寧謐銷鋒灌燧俾薄海內外永慶昇平厯念河防

親臨指授覽全河之形勢運疏濬之神功開中河築高堰

而淮黃底績東南獲衽席之安濬永定隄子牙而漳滏
順流畿甸享膏腴之利地平天成萬世永賴至若

躬行節儉而大官服御務崇樸素之風

秉德謙沖而

徽號鴻名屢却廷臣之請

至誠不息而朝乾夕惕本行健以法天

聖敬日躋而肅廟雖宮儼動容之中禮凡茲盛美莫罄名
言是以久道化成太和翔洽天庥滋至歲奏屢豐戶樂

盈寧人登仁壽自古未賓之國重譯踵至戴高履厚莫不尊親

升遐之日自僻壤遐陬遠暨蠻夷荒服含生負氣之倫感慟哀號如喪考妣羣臣恭擬

廟謚曰

聖曰

仁祇荐

祖號萬口一心允孚公論猗歟休哉至矣大矣朕纘承鴻

緒念切紹庭踐阼之初即簡命大臣等董率儒臣開館纂修發金匱之祕藏稽綸言於政地表年繫日敬謹編輯紀言紀事鉅細靡遺朕齋肅展禮親加詳閱歷今九載敬成

聖祖仁皇帝實錄若干卷又於尊藏皇史宬外恭繕全帙虔供几案時時展讀以遂朕敷時繹思繼志述事之意於戲帝載難名而歲功昭布日月之運行星辰之經緯可以仰觀成象焉聖德難名而治法昭垂條理之精詳

規模之宏遠可以仰求成憲焉我

皇考參贊位育之神欽明精一之蘊雖非簡牒所能殫述
而

鴻謨駿業炳於紀載與天無極萬世勿諼後之紹作君作
師之任求治統道統之全者於是乎在敬弁言簡端以
昭示我子孫俾永永敬承於億萬世謹序

皇上御製序曰

皇祖聖祖仁皇帝臨御六十一年耿光大烈融燦古今積

惠襲恩淪浹寰宇功德之盛具載

實錄垂千萬禩我

皇考世宗憲皇帝御製序文推本

上天孚佑下民

列祖垂裕後嗣篤生

至聖開邃古以來未有之盛業煌煌乎言之廣大精微至

矣蔑以加矣予小子寅承丕緒紹聞衣德兢兢業業

仰思繼述

皇祖

皇考成憲日於治事之先展誦

列祖實錄周而復始

皇祖實錄卷帙浩繁排日敬覽寒暑靡間至自今凡數閱
矣緬惟尚書史記所載古帝王治化之隆各極其至
而孔子於堯曰惟天為大惟堯則之蕩蕩乎民無能
名焉於舜曰無為而治孟子則曰王者之民皞皞如
也予嘗推繹其旨想見唐虞中天之盛乃今思

皇祖之世之民有以知孔孟之言信乎其能知聖人也

皇祖自親政之始即手鋤三孽蕩定南疆滇黔閩粵之與
揭日月而掃氛霧海內赤子喁喁向風由是亭之毒
之煦以淳風沃以甘澍浸以醲化甄以大鈞數十年
之間南奠臺澎北犁沙漠命將肆征而間左無徵發
之警

親臨淮河指授方畧歷吳會陟會稽登岱宗謁闕里西巡
關隴抵雲中三覲

祖陵觀於東海歲出塞外獮狩上都

天行之健古無以加而庠序詠仁黜庶樂業市廛殷阜卒
伍服習熙熙然相忘於無所事事於焉正晷緯考律
度定元聲煥為

宸章灑為

奎翰集古帝王文治之大成而

穆清宥密凝然不見經營之迹簡任公卿百執事罷使而
責其成俊壽魁碩布列有位外自節鉞連帥以至守

令賢否清濁立判剔侵蠹勵廉平吏治烝烝無綜核之煩而德意宣究蠲逋賑恤肆赦緩刑指揮

深宮之中風馳萬里匹夫匹婦無不浸浚涵育鼓舞德化而不能自己當其時誠所謂不識不知順帝之則者耶歷今二十餘年遺澤餘烈深入人心固結而不可解迴溯

鼎成之初謳思如一日夫乃恍然曰是所謂至仁如天民無能名者也無為而治恭己南面者也孟子所謂王

民皞皞者也於戲四海九州之民無得而名予小子
又烏能名之憶自幼冲蒙

皇祖撫愛日侍

左右用人行政皆覩記所及簡冊紀載政如杓衡規天躔
次測日可見者迹象而已於穆之運重離之明終無
能言其所以然者盥誦之次稽首敬為之序以誌紹
庭繼序之忱於罔斁云

聖祖仁皇帝聖訓六十卷

雍正九年

世宗憲皇帝恭編

世宗憲皇帝御製序曰朕荷

皇考聖祖仁皇帝付託至重兢兢業業早作夜思以期無負繼述仰惟

皇考留貽矩矱朕得監於成憲是則是倣實天下萬世所當欽承觀法爰命大學士等纂修

聖祖仁皇帝實錄閱時九載書成千卷自古帝王功德之

隆盛記載之繁富未有加於此者顧

實錄乃編年之書我

皇考順時布化若天道之流行春夏秋冬各協其宜而其
中條分縷析飭綱振紀精微所寓隨舉一端皆為法式
於是復令纂修諸臣分類恭輯

聖訓六十卷洋洋乎盛德大孝敬

天勤民文教之誕敷武功之赫濯禮樂之明備政刑之修
舉一經

睿謨千古莫易夫六經諸史之傳皆有經有緯朕於

皇考神功聖德精心體察以

實錄為經以

聖訓為緯於編年見因時之宜於分類見隨事之要一敷
施而有所循也一話言而有所守也一寤寐飲食而有
所遵也於戲如天之仁如日之照如神之哲萬類雖隤
莫不含弘並包於

聖人之度內而儆惕訓諭之辭尤必凜凜於時幾孜孜於

熙績勤勤於小民之恬養疊疊於嘉師之祥刑蓋

聖心愈切而

聖德愈崇是以統乾坤之範圍而不過發聖賢之闡奧而
靡遺以六十餘載之鴻規為千萬世後昆之垂裕其所
裨益曷有涯量哉此朕命官敬纂

皇考實錄而又恭繕

聖訓之深意子子孫孫其永寶諸

皇上御製序曰自古聖人誕受天命為下民君師必亶聰

明睿智之資首出乘乾以綏猷而立極凡其經緯萬
端敷之彛訓者罔不深切著明炳日星而章雲漢典
謨所載雅頌所陳唐虞三代之隆有如一轍欽惟

皇祖聖祖合天弘運文武睿哲恭儉寬裕孝敬誠信中和
功德大成仁皇帝聖德廣運久道化成文治光昭武功赫
濯薄海內外深山窮谷之衆總淪浹於仁心仁政之
中教思無窮訓辭深厚歷考熙明之運未有躋此崇
隆者也肆我

皇考世宗憲皇帝以

聖繼

聖用人行政一一仰法

前徽既纂修

實錄成書復分類恭輯

聖訓六十卷俾

皇祖六十餘年敬

天尊

祖經國保民農田學校禮樂兵刑之盛蹟見之都俞吁咈
間者粲然常新矍然備具永貽我後嗣子孫億萬年
昇平矩範蓋

皇祖性本生安道兼創守實集千古聖帝明王之大成是
以

聖謨洋洋明徵定保宏綱鉅目有要有倫精一之心傳蕩
平之王路胥不外乎此也予小子昔在齠齡早荷

聖慈賜育宮庭祇聆

訓迪茲膺基緒紹聞衣德之志兢兢業業不懈益虔昕夕
尋繹惟期懋遵

祖訓以無負

皇考善繼善述之詒謀顧金匱石室之藏中外無得見者
爰命儒臣敬謹繕寫授之剞劂庶我

皇祖聖祖仁皇帝建中表正牖民覺世之言昭垂寰宇羣
工士庶咸得漸摩於

聖訓之崇閱而率由無斁也不亦休歟謹序

臣等謹按所分六十卷別為三十二類欽惟
聖祖仁皇帝秉中和之德

膺上壽之符歷六甲五子之遙際萬世一時之盛故

垂訓獨多而載筆亦最富球圖美備之觀直遠邁二典三
謨而上之矣

世宗憲皇帝實錄一百五十九卷

雍正十三年十月

皇上命大學士尹泰張廷玉朱軾等恭修

皇上御製序曰國家受

天眷命集慶垂光承承繼繼肆我

皇考世宗憲皇帝荷

三聖之洪庥祗紹

聖祖仁皇帝丕緒宵衣旰食底區宇於和恒以茂衍億萬
年無疆之祉厚德隆功溢於簡牒巍乎煥乎治平之
盛軌未有逾茲者也

皇考徇齊敦敏仁孝性成早歲承歡

聖祖友愛同氣迨膺大統一切禮儀隆備

廟號尊崇莫不定自

宸衷合乎典則仰惟

聖祖仁皇帝臨御六十餘年濊澤洽人心醇化流方外豐
亨豫大之福極盛無加

皇考承邳治之餘因時制宜以善繼而善述惟是本之以
誠持之以敬行之以中正要之以寬仁用能杜玩愒
於熙時綿昇平之泰運大經大法粲然為後嗣子孫

法馬荐馨

郊

廟必躬必親旁秩祀典懷柔百神間遇水旱微愆祈禱
深宮罔弗潛孚立應

聖學高深探性命之精操治平之要天德王道一以貫之
隆禮

先師孔子增祀先儒右文重道之典超越常制猶復表
章經術廣勵士風籲俊興賢蔚有德造辟雍鐘鼓後

先疏附之風殆無以過念用人為愛民之本自公孤卿尹下至庶司百執事登明選公咸稱任使而守令之親民暨封疆大吏之司董率者尤厘

聖心重撫字之方嚴貪墨之罰明四目達四聰賜復蠲租農桑被野遂躋斯民於衽席之安刑罰者所以佐政教之不逮也

皇考如天好生既已刊布律令俾愚氓重於犯法復詳定貴賤服色兵民婚喪禮制更闡明

聖祖諭旨十六條細加訓註家諭戶曉翕然從風河防之
關於運道生民也萬里黃流匯以百川之水充徐而
下歲苦沮洳

皇考默運神謀指示經畫加長淮之石堰闢三省之引河
渙發帑金厥有成績又吳越海塘南北水利凡可以
惠此蒸黎者悉因時而修舉之先是

聖祖親統六師平定朔漠威靈所加青海扎什巴圖爾等
震讐承令因沛殊恩畀以爵秩垂三十年而羅卜藏

丹津與吹拉克諾木齊等誕敢首造逆謀擾犯邊域
皇考聲罪致討密授方畧於閫帥戈鋌所指電掃風驅振
旅獻俘勒成功於太學準噶爾蠢動西陲數肆患於
喀爾喀部落南方苗蠻蔓延行旅居民苦其侵掠

皇考為藩服計久遠為遐陬圖寧謐或命將興師或諭文
武諸臣隨宜搜勦至逆夷悔禍輸誠傾心納土則皆
宥其前愆而曲賜包容焉德威並耀無遠弗屆賜安
南之地減朝鮮之貢俄羅斯南掌等國阻昧幽深胥

漸被於聲教他若傲怠荒矯浮薄求言納諫教孝褒忠宗室天潢之胄多方造就八旗根本之地備予綢繆頒訓諭於臣工飭官常也錫侯封於明裔示殊典也豐盈徧萬國而服御有經見

聖躬之儉焉嘉應在庶徵而憂勤益懋昭

聖德之謙焉蓋我

皇考誠敬之心中正之道寬仁之恩悉同符乎

聖祖以綏猷而立極十三年中有如一日宜其治功之盛

網舉目張蕩蕩平平樂樂利利傳之愈遠而可法可
守也歟予小子繼序之初即命監修總裁大學士等
董率儒臣稽歷年之紀載敬謹纂修次第進呈齋肅
披閱迄今五載恭成

世宗憲皇帝實錄一百五十九卷昔在唐虞三代制治保
邦之道備載於書惟我

皇考際重熙累洽之盛勵精圖治良法美意歷久彌新玉
簡琅函實與典謨訓誥相輝映用是裒繕尊藏朝夕

循誦以志繹思衣德之義垂裕後昆永永無極焉謹
序

世宗憲皇帝聖訓三十六卷

乾隆五年

皇上恭編

皇上御製序曰自古人君有盛德大業者其規畫周詳
而詒謀悠遠則必敷之彝訓以明定保之徵紀之簡
編以著經綸之績非徒為一時事功計也亦將以示

後嗣昭法守焉我

皇考世宗憲皇帝亶聰明睿智之資建中立極茂登上理

御極十有三年體

聖祖之心以為心法

聖祖之政以為政祇承

郊

廟懋睦宗親整飭官方修明法度正人心厚風俗文經武

緯禮序樂和凡宏綱鉅目罔不默運於

深宮乾健之精神以圖其久安而計其久遠

聖謨洋洋有典有則或因人以立教或隨事以敷言存之
淵然而有條理發之煥然而無凝滯其與二帝三王
都俞吁咈咨傲誥誡之旨曷以異焉允矣彪炳之

綸音治平之模範也可不謂至盛者歟既命大學士等詳
慎纂輯恭成

世宗憲皇帝實錄一百五十九卷復於編年繫日之中分
類備錄恭成

聖訓三十六卷仰惟

皇考德合天地明並日月序參四時躬荷

聖祖仁皇帝積厚之貽善繼善述故乃保泰持盈誠民阜

物寓惇大於明作劑整肅以寬仁致治規條炳如星

日豈第予小子朝乾夕惕之衷期於謹凜率由嗣守

丕緒繼自今億萬斯年子孫臣庶沾被熙洽之澤者

庶咸有以遵

聖訓之光昭而頌

鴻猷之允塞也謹序

臣等謹按所分三十六卷析為三十類仰惟

世宗憲皇帝纘承

前緒百度更極其修詳庶司倍申其箴戒我

皇上踐阼以來永維

至訓故綜述至為詳明而積帙乃臻美富

燕翼之謀鍾於

至聖宜乎丕迪

前光而

萬年久道也

上諭內閣一百五十九卷

雍正七年和碩怡親王允祥和碩莊親王允祿等
奉

敕繕錄校刻乾隆六年和碩和親王弘晝等奉

敕續成

臣等謹按是編本無卷數四庫全書恭依舊次釐

為一百五十九卷仰惟

世宗憲皇帝勵精圖治一日萬幾諸臣於陳奏事件皆得

專函呈進上邀

御覽必

親御丹毫詳為

指示所以勵俗維風飭綱整紀者罔不深切著明允宜宣

示寰區導揚

至治

上諭八旗十三卷

上諭旗務議覆十二卷

諭行旗務奏議十三卷

雍正九年和碩莊親王允祿等奉

敕編

臣等謹按是編凡三集自康熙六十一年十一月
十七日以後所奉

諭旨涉於八旗者曰

上諭八旗其先錄

諭旨而綴以八旗大臣奏議者曰

上諭旗務議覆其先錄八旗大臣所奏而恭錄

諭旨於後者曰

諭行旗務奏議三編共為一書兼用清漢文刊布蓋即
輦轂至近之地而

綸綍所宣已積成巨冊仰見

睿慮周詳不遺於邇所以深維根本之重者有如是之反

復著明者哉

世宗憲皇帝硃批諭旨三百六十卷

雍正十年奉

敕校刊

世宗憲皇帝御製序曰朕向在藩邸未諳政事不識一人
毫無閱歷聞見及受

皇考聖祖仁皇帝付託之重臨御寰區惟日孜孜勤求治
理以為敷政寧人之本然耳目不廣見聞未周何以宣

達下情洞悉庶務而訓導未切誥誡未詳又何以使臣
工共知朕心相率而遵道遵路以繼治平之政績是以
內外臣工皆令其具摺奏事以廣諮諏其中確有可採
者即見諸施行而介在兩可者則或敕交部議或密諭
督撫酌奪奏聞其有應行指示開導及戒勉懲儆者則
因彼之數陳發朕之訓諭每摺或手批數十言或數百
言且有多至千言者皆出一己之見未敢言其必當然
而教人為善戒人為非示以安民察吏之方訓以正德

厚生之要曉以福善禍淫之理勉以存誠去偽之功往復周詳連篇累牘其大指不過如是亦既殫竭苦心矣至其中有兩人奏事而朕之批示迥乎不同者此則因人而施量材而教嚴急者導之以寬和優柔者濟之以剛毅過者裁之不及者引之並非逞一時之胸臆信筆直書前後矛盾讀者當體朕之苦心也此等奏摺皆本人封達朕前朕親自覽閱親筆批發一字一句皆出朕之心思無一件假手於人亦無一人贊襄於側非如外

廷宣布之諭旨尚有閣臣等之撰擬也雍正六年以前
晝則延接廷臣引見官弁傍晚觀覽本章燈下披閱奏
摺每至二鼓三鼓不覺稍倦實六載如一日此左右近
侍及內直大臣所備知者近年以來天下庶政漸次就
理下情稍覺洞達臣工之奏摺較前減少而朕躬精力
亦不如前批答之事始從簡便此實情實事可舉以告
天下者今檢內外諸臣繳回硃批之摺不下萬餘件因
思自古帝王治天下之道以勵精為先以怠荒為戒朕

非敢以功德企及古先哲王而維此勤勉之心自信可
無忝於古訓實未負我

皇考付託之深恩也又念此等批示之語實出於朕之苦
心或可為人心風俗之一助但本人承旨之時不敢宣
露於外他人無由知之今將外任之大臣官員奏摺經
朕手批酌量可以頒發者檢出付之剗刷計算實不過
十分之二三俾天下臣民展讀咸知朕圖治之念誨人
之誠庶幾將此不敢暇逸之心仰報我

皇考於萬一耳或人人觀此而感動奮發各自砥礪共為忠良上下蒙福朕心愉快更當何如

皇上御製後序曰

皇考世宗憲皇帝天縱聖神精勤庶政四方文武臣僚具摺言事者日或數人人或數事緘封直達

御前手自批發或立見施行或咨詢廷議善者溫綸褒予過者訓誡諄諄隨宜指示悉出

睿裁一字不假手於人

御極十有三年常如一日粵雍正十年

特檢歷年批發奏摺命內廷詞臣繕錄校理付諸剞劂彙
成數帙輒以

頒賜在廷羣臣工未告竣奄遘

上賓予小子纘紹丕基敬展遺篋見所貯

手批奏摺不下數萬

奎畫爛然充溢巨麓然以未經

皇考檢定不敢意為增益謹就檢錄已定者彙著為目前

後凡二百二十三人分一百一十二帙統為十八函
當時隨檢隨發無先後倫次茲亦不復排類蓋摺奏
浩繁不勝編錄所刻僅十百中之一二畧見大凡本
非全覽故也既告歲事僅綴序言於後洪惟我

皇考至仁如天至明如日至誠如神簡拔賢才任之以心
膺股肱之寄開誠布公藹然家人父子無不可盡之
言諸臣之才具大小短長與性質之剛柔強弱克知
灼見如權衡繩尺之不爽片長足錄亟登而進之有

不及則激厲而開導之稍肆焉則裁抑之其陷於過
始則訓飭之能改則已不悛則戒儆之使知悔艾終
於怙惡則亦未嘗姑容然哀矜惻怛之意尚流溢於
毫楮間也同一事而此或俞之彼或咈之非有所好
惡於其間也蓋俞之者必有可俞之道而咈之者亦
必有可咈之端同一人而始或予之終或斥之非有
所喜怒於其間也蓋始有可予則予之終有可斥則
斥之明燭幾先坐悉情偽遠隔萬里遲閱數年

睿鑒所周範圍莫越正人心厚風俗兢兢業業儆戒無虞
雖屢豐見告瑞應頻仍而惟是憂勤惕厲之心久而
並篤記有之曰天道至教聖人至德春秋冬夏風雨
霜露無非教也我

皇考之為治一天道之運行教澤所被百志惟熙即萬世
而下尚如日月之臨照光景常新春風之煦然被物
不自知其感動奮發而興起也予小子寅承鴻業自
惟寡昧無能企逮萬一仰法

皇考明目達聰孜孜圖治之心祇紹

徽猷夙夜黽勉其服教畏神警省弗怠之志詎敢以歲月

易耶謹序

臣等謹按秦漢以後章奏既興批答之詞多由代
擬即有偶然涉筆多不過寥寥數語而鳳尾諾之
名且止一字從未有如我

世宗憲皇帝之

親灑宸毫一一

手敕批答者良由

聰明天縱

志氣如神故

明燭無疆不遺鉅細卷中所載臣工奏摺凡二百二十三


人皆恭錄

批示多者至數百言其肯綮之處皆經

御筆圈抹微特陳奏諸臣曉然於得失之故即千萬世下

亦必因端竟委共仰

權衡自謨典以來未有勤政若斯之懋勉者已



皇朝文獻通考卷二百二十